



La Chalavaina es darcheu averta

Dürant quatter mais d'eira serrà l'Hotel Chasa Chalavaina a Müstair. Il motiv d'eiran renovaziuns a l'intern. Dürant quellas renovaziuns esa gnü miss pais impustüt da mantgnair la substanza istorica. Uossa driva el darcheu sias portas.

Daspö bundant 770 ons sta l'Hotel Chasa Chalavaina – dal rest il plü vegl hotel da la Svizra – in Plaz Grond a Müstair in posiziun prominenta güst in fatscha da la clostra San Jon. Davo 50 ons vaiva tscherchè l'on passà il proprietari ed anteriur osp, Jon Baptista Fasser (81) ad üna successura o ad ün successur. Per cumprar l'hotel s'han in seguit miss insembel ils respunsabels dal Patrimoni cultural mundial da l'Unesco Clostra San Jon e fundà la Fundaziun Chasa Chalavaina. Dürant ils ultims quatter mais d'eira l'hotel serrà per far renovaziuns a l'intern. Uossa driva el darcheu.

Mantgnair il caracter da la chasa

Ün dals böts da la Fundaziun Chasa Chalavaina es tanter oter da mantgnair il caracter original da l'hotel. Perquai sun gnüdas fattas be ligeras renovaziuns a l'intern – uschè sun per exaimpel gnüts glimats giò illas stanzas ed illas stüvas da lain ils fuonds e las intabladüras, i'ls piertans es per part gnüda rendüda visibla la reboccadüra istorica ed üna o tschella paraid ha surgni üna nouva liadüra cun chaltschina fat-ta svesa. Fin a pacas excepziuns sun eir tuot las stanzas adüna amo drizzadas aint culla mobiglia veglia. Minchüna da quellas 18 stanzas es ün unicum, ha seis agen caracter e perfin seis agen nom – uschè stan scrit vi da las portas noms sco «La stanza dal preir», «L'abadessa » o «Il butschin da diogenes». Manà las lavurs da renovaziun ha Uli Veith, il mainagestiun da l'hotel: «Nus nu vain toc la substanza istorica da la chasa. Tuot quai chi'd es gnü fabbrichà aint implü es mobil ed as lascha darcheu allontanar sainza problems.»

S-chaffir ün fil cotschen

El es impustüt fich cuntaint ch'el ha pudü realisar in l'Hotel Chasa Chalavaina eir sias aignas ideas: «Minchün ha seis gust, ma eu craj cha nus hajan pudü s-chaffir ün fil cotschen chi's tira tras la chasa.» Il nouv uster da la Chalavaina nun es però hotelier. Insè es Uli Veith econom ed oriund dal Vnuost. Dürant bod desch ons es el stat president cumünal da Mals – il grond cumün politic dadour il cunfin da Müstair. Daspö il 2015 es el mainagestiun da la Fundaziun Pro Clostra Son Jon. «Eu n'ha fingià badà sco president cumünal ch'eu lavur gugent cun umans, perquai m'haja tantà da surtour eir quista sfida», disch Uli Veith ed agiundscha cha l'Hotel Chasa Chalavaina til haja adüna fingià fascinà. Sco hotelier metta el impüstüt pais a la dürabilità e prodots regionalis. Uschè as chatta in l'intern per exaimpel tapets fats da la Tessanda a Sta.Maria e savun da Soglio, i'l restorant vegnan servits vins da la Val Poschiavo e charn da la Val Müstair.